



Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq
inatsisartut@inatsiartut.gl

UKA2025/161-mut tunngatillugu ataatsimiititaliap apeqqutaanut akissut

19-01-2026
Suliap normua: 2025-16685
All. nr.

Asasakka Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliami ilaasortat.

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Aatsimiititaliap imm. 161 pillugu allakkatigut apeqqutai 17. december 2025-mi tiguakka.
Tullinnguuttumi apeqqutit immikkut issuarneqarput ataanilu akissuteqarfigineqarlutik.

Apeqqut 1. Tuluttut oqaatsit ilinniartitaanerup iluani atugaaneruleraluttuinnarnerat qanoq Naalakkersuisunit uppersarneqarpa?

Akissut:

Inuiaqatigiit ineriartorneranni, nunarsormioqataanermi nunanullu tamanut atanerulernerq tunngavigalugu, ilinniartitsineri, sulineri nunanullu tamalaanut atassutini tuluttut atugaaneruluttuinnarnerat Naalakkersuisut taamaasillutik paasivaat.

UKA 2025/161-imut akissuteqaammi takuneqareersinnaasutut Naalakkersuisut nalilerpaat tuluttut oqaatsit inuiaqatigiinni, tassunga ilanngullugu ilinniartitaanermi sulit atugaaneruleriartortoq. Ineriartorneq taanna nunarsuarmioqataanermit teknologiikkullu ineriartornermut, tassunga ilanngullugu tuluttut ilinniartitsissutiniq digitalikkullu isaavinnik atuinerulernermit kiisalu Naalakkersuisut ilinniartitsineq sulisitsisunik nunani tamalaani suleqatigisanik oqaloqateqarnerinut atavoq. Tamatuma saniatigut nunatsinni nunanilu tamalaani ingerlaqqiffiusumik ilinniakkanit misilittakkat ilanngunneqarput, matumani tuluttut oqaatsit atorlugit ilinniartitsineq atuarsimasassallu amerlanerupput, taamatuttaaq suliffeqarfinni tuluttut piginnaasat annertusiartortumik piumaneqarneruleriartorput.

Apeqqut 2. Nunarsuarmioqataaneruleraluttuinnarneq nunanullu tamalaanut akuuneruleraluttuinnarneq eqqarsaatigalugu atuartut oqaatsitigut piginnaasaqarfiinut piumasaqaatit nutaat suut nassatarineqarpat?

Akissut: Taamatut ineriartortoqarneratigut atuartut nunani tamalaani pissutsini oqaatsinik atuisinnaanissaat, tassunga ilanngullugu tuluttut atorsinnaasunik piginnaasaqarnissaat piumasaqaataavoq. Tassunga peqatigitillugu oqaatsit pillugit ilisimasallit¹ oqaatigaat,

¹ "Oqaatsinik ilikkagaqartarnerup pitsanngorsaavigineqarnissaa pillugu immikkut ilisimasallit, 2018"

oqaatsit ilitsoqqussat allamiut oqaasiinik iluatsilluartumik atuilernissamut tunngaviulluinnartartut.

Nunarsuarmioqataaneq nunanullu tamalaanut atanerulerneq nuttarnersitsisarpur, nunani tamalaani ilisimasaniq ilisimasaqalersitsisarpur aamma nunarsuup sinnerani ataatsimoorfinnut peqataalersitsisarpur – meeqqat atuarfianni atuartunuinnaanngitsaq, aammali ilinniagaqartunut inuiaqatigiinnullu tamanut. Ineriartornerup kingunerisaanik Kalaallit Nunaat nunani tamalaani pissutsinut, soorlu niuernermit inuussutissarsiornermullu tunngasuni akuuneruleriartorpoq. Assersuutigalugu aalisarnermut suliasaqarfimmi tunngavissat nutaat namminersorlutik ingerlatsisut nunani tamalaani suleqatigisanik annertusisamik suleqateqarnissaannut niueqateqarnissaannullu periarfissaqarnerulersitsisinnaapput, taamaattumillu tuluttut piginnaasaqartariaqarluni.

Taamatut ineriartornerup kingunerisaanik atuartut nunatsinni nunanilu tamalaani ingerlaqqiffiusumik ilinniakkaminnik naammassisaqarsinnaanissaannut digitalikkullu ilinniartinneqarnermi, kulturikkut paarlaasseqatigiinnermi suliffeqarfimmilu peqataalluarsinnaanissaannut nunani tamalaani oqaatsini, pingaartumik tuluttut atorsinnaasumik siusissukkut piginnaasaqalernissaat pisariaqarpoq.

Apeqqut 3. Kalaallit tuluillu oqaasiinik atuartitsisarnerup qanoq nukittorsarneqarnissaa pillugu

naalakkersuisoqarfiup aqutsisoqarfiullu suliai pillugit Naalakkersuisut annertunerusumik

paasissutissiisinnappat, tassunga ilanngullugu danskisut oqaatsit atuartitsinermit atorreqarpallaarunnaarnissaannik kinguneqassanersoq?

Akissut: UKA 2025/161-imut akissuteqaammi takuneqarsinnaasutut Ilinniartitaanermut Naalakkersuisoqarfik aamma Ilinniartitaanermut Aqutsisoqarfik meeqqat atuarfianni kalaallisut tuluttullu ilinniartitsineq qanoq pitsanngorsarneqarsinnaanersoq pillugu nalilersuinermit suliaqarput. Ilinniartitaanermut Aqutsisoqarfik ilaatigut ilitsoqqussaralugu oqaatsinik ilinniartitsineq qitiutillugu ilinniartitsineq pillugu festivalertitsisimavoq ukiunilu arlariinni klasetrinini tamani kalaallisut ilinniartitsinermit atuartitsissutinik ineriartortisinissaq sanaartornissarluni pingaarnersiorsimallugu.

Atuartitsinermit danskisut ilinniartitsisarneq allanngortinneqassappat naggataatigut tamanna naalakkersuinikkut aalajangiiffineqassaaq. Kalaallisut tuluttullu pingaarnertinneqalissappata siunissami tamatuma kingunerisaanik danskisut oqaatsit pingaaruteqarpallaarunnaassapput, tamannali naalakkersuinikkut aalajangiiffineqartariaqarpoq. Eqqarsaasersuutit taakku meeqqat atuarfiat pillugu inatsisip nutarterlugu suliarineqarnerani apeqqutinut, Naalakkersuisut UPA2026-mi saqqummiussassaannut kiisalu oqaatsinik ilinniartitsinissamut iliuusissatut pilersaarutissatut suliarineqartussamut ilanngunneqartussaapput.

Naalakkersuisoqarfimmit Ilinniartitaanermullu Aqutsisoqarfimmit iliuusissatut pilersaarummik suliaqarnermi pissusissamisoortumik ilanngunniarpaat, atuartitsissutit aqqissugaanera, tiimit amerlassusissaat, ilinniartitsinermit atortussat aamma ilinniartitsisut piginnaasaat pillugit eqqarsaasersuutit kiisalu oqaatsinik ilinniartitsilluni suliamut tamarmiusumut atatillugu klassini assigiinngitsuni siuariartorneq ataqaatigiittoqarneralu ilanngullugit.

Apeqput 4. Oqaatigineqartoq "ilisimavarput allanngui neq taama ittoq kigaatsumik akisussaassusilimmillu ingerlanneqartariaqartoq" qanoq isumaqarner soq pillugu Naalakkersuisut itisiliisinnaappat?

Akissut: Meeqqat atuarfianni oqaatsit pillugit politikip aamma atuartsissutit aaqqissugaanerisa allanngortinniarneqarnerat killiffilersorlugit pisariaqarpoq aamma ilinniartitsisut, angajoqqaat, atuartut sulisullu immikkut ilisimasallit soqutigisallillu peqataatinneqartariaqarlutik. Taamatut suliaqarnermi ilinniartitsinerup pitsaassusaa attatiinnarniarlugu sapinngisamillu pitsaanerulersinniarlugu misileraanissaq, piginnaasanik ineriartortitsinissaq, ilinniartitsinermi atortunik ineriartortitsinissaq ingerlaavartumillu nalilersuissarnissaq pisariaqarput.

Tassunga atatillugu Oqaasileriffimmit nangaanartoqartitsilluni oqaaseqaatigineqarsimasoq innersuussutigineqarpoq, UKA 2025/161-imut akissuteqaammi imatut allassimasoq:

"Oqaasileriffiup kalaallit oqaasiisa inuiaqatigiinni kulturikkullu immikkut tunngaviunerisa attatiinnarneqarnissaannut mianersorfissaq pingaaruteqartoq tikkuarpaa. Oqaasileriffiup ilaatigut erseqqissaatigaa, tuaviuussamik allanngortiterineq, tassa tuluit oqaasiisa nunami allamiut oqaasiisut ingerlaannartumik atuutsilerneqarnerat tamatumunngalu peqatigitillugu danskit oqaasinik atorunnaarsitsineq, kalaallit oqaasiisa inissisimanerannik atugaanerannillu sanngiillitsinnaasoq. Oqaasileriffiup aamma oqaatigaa, tuluit oqaasii kalaallit oqaasiisa atuuffigisariaqagaanni atugaalereersut, tamannalu oqaatsitta ineriartornerannut inissisimanerannullu annertuutigit kingunerluuteqarsinnaasoq. Taamaattumik Oqaasileriffiup inassutigivaa, allannguisoqartinnagu meeqqat atuarfianni kalaallit oqaasiinik atuartsineq malunnaatilimmik nukittorsarneqaaqqaassasoq, aammalu tuluit oqaasiinik annertunerusumik ilinniartitsisoqalersinnagu tunngaviusussat pisariaqartut pilersineqaaqqaassasut."

Tamatuma saniatigut oqaatsit pillugit ilisimasallit mianersoqqutigaat sukkavallaamik allannguisoqassanngitsaq, tamanna atuartut oqaatsitigut ineriartornerannik ajoqusiisinnammat.

Apeqput 5. Atuartunut nukarliit alloriarfianniittunut atuartsissutinik ikilisaasoqarnissaannik pisariaqartitsisoqarnera pillugu Naalakkersuisut naliliisimanerannut suna tunngavigineqarpa?

Akissut: Nalilersuineq perorsaannermut tunngasunik eqqarsaatersuutinik tunngaveqarpoq, meeqqat ilinniarnarat atugarissaarnerallueqqarsaatigineqarlutik, tassunga ilanngullugu atuartut nukarliit atuarnerminni itisiliinissamut, ataqatigiinnissamut nikerartoqannginnerunissaanillu pisariaqartitsinerat. Atuartitsissutit aaqqissugaanerisa allanngortinneqarnerat pitsaassutsimik kivitsinertut isigineqassaaq, atuartut tunngaviusumik piginnaasaminnik piffissaqarnerullutik ineriartortitsinissaminnut, tamatumunnga peqatigitillugu pinnguarnarunissamut, aalanerunissamut, nutaalorsinnaanissamut atsstsimoornissamillu ineriartornissamut inissaqartitsinerullutik. Nunani tamalaani misilittakkat takutippaat, ukiumi atuarfiusumi siullermi atuartsissutut ikinnerunerinuttunngaviusumik piginnaasarisaat pitsanngorsaaffigisaraat.

Aamma oqaatsit pillugit ilisimasallit oqaatigaat, ukiuni atuarfiusuni siullerni atuartsissutit ikinnerunerinut tunngaviusumik oqaatsinik ilikkagaqarsinnaaneq pitsanngorsaaffigisaraa.

Apeqquut 6. Atuartunut nukarliit alloriarfianniittunut kalaallit oqaasiisa nukittorsarneqarnissaannut pisariaqartitsisoqarnera pillugu Naalakkersuisut naliliisimanerannut suna tunngavigineqarpa?

Akissut: Atuartut amerlanerusut kalaallisut ilitsoqqussaralugu oqaaseqartuupput aamma atuartitsinermit kulturimilu kalaallisut oqaatsit pingaarnepaallutik. Atuarnermut, allannermut oqaatsinik isumasiuinnermut kiisalu atuartut kinaassusaannut faginilu tamani ilinniaqqinnermut atuartuni nukarlerni alloriarfianniittuni nukittorsaanissaq pingaaruteqarlunnartoq nalilerneqarsimavoq.

Taamani Naalakkersuisut 2017-imi kalaallit, danskit tuluillu oqaasiini atuartitsinerit meeqqat atuarfianni qanoq ingerlasarnersaq paasiniarniarlugu nunani tamalaani suliamut ilisimasaqatigiinnik pilersitsipput.

2018-imi suliaq taanna nalunaarusiamik "Oqaatsinik ilikkagaqartarnerup pitsanngorsaavigineqarnissaa pillugu immikkut ilisimasallit" qulequtaqartumik inerneqarpoq, taassuma ilinniartitaanermit oqaatsit inissisimanerannut atugaanerannullu isummat innersuussutillu imarai.

Oqaatsinut immikkut ilisimasaqatigiit kalaallisut oqaatsit patajaatsumik tunngaveqarnissaat atuartut ukiuni atuarfigisaanni siullerni ilinniarnarannut pingaaruteqarlunnartoq erseqqissarpaat:

"Meeqqat kalaallit oqaasiinik nuannarinninnerat tanngassimaaruteqarnerallu misilittagai ilisimasaallu ilanngullugit annertusarneqassapput. Oqaatsit pillugit tupigusuuteqarneq, alapernaanneq, misigisaqarneq, nutaaliorneq pinnguarnarlu oqariartaatsillu – pingaartumik minnernut – oqaasilerinermik ilisimasaqarnermit eqqortuliornermillu pingaarnarupput. Oqalunnarneq atuartut misilittagaat ulluinnarnilu inuunerat tunngavigalugu sammisat naleqquttut pillugit attaveqatigiinnikkut annertusarneqassaaq.

Siunnersuutigisarpur tassavaq atuartunut nukarlarsanut kalaallisut atuartitsineq misigisatigut, isumassarsiornikkut pinnguaatitigullu pissasoq, pingaarnertullu suliat oqaluttuallianut isummanillu avitseqatigiinninnermut atassuteqassasut taamaalillutillu kingornagut ilikkariartuaassapput allattariarsornikkullu isummorsinnaalissallutik. Meeqqat oqalunnissamik, oqaluttuarnissamik, taaguineq, erinarsorneq kalaallisullu allanneq atorlugit oqaatsitigut tunuliaqutaat apeqqutaatinnagu kaammattorneqassapput. Taamaattumik pingaaruteqarpoq meeqqat tamarmik nunatsinni peroriartortut kalaallisut ilinniarsinnaanissaat atuartitsinerlu atuartut eqimattakkaat pisariaqartitaat naatsorsuutigisaallu malillugit assigiinngiaarsinnaanissaa."

Apeqquut 7. Atuartunut nukarliit alloriarfianniittunut danskisut atuartitsisarnerup allannagortinneqarnissaanik pisariaqartitsisoqarnera pillugu Naalakkersuisut naliliisimanerannut suna tunngavigineqarpa?

Akissut: Oqaatsitigut siuariartorneq ukiunilu atuarfiusuni siullerni artukkiisarneq pillugit isumaliutersuutit naliliinnermi tunngavigineqarput. Matumani aamma ilisimasat ilisimatusarnermut tunngavillit nalinginnaasut, atuartut ukiuni siullerni atuarfiusuni ilitsoqqussaralugu oqaatsini patajaatsumik ineriartortarnerisa kingorna, oqaatsinut allannut naleqqussartarnerannut ataatsimullu isigalugu ilinniarnarannut pingaaruteqassusaanik takutitsisut ilanngunneqarput.

Taamaattumik nukarliit alloriarfiini danskisut fagi allanngortinneqassappat tamanna atuartut oqaatsitigut piginnaasaat oqaatsitigullu ineriartorneri innimigalugit, atuartitsinerup atuartut inerisimassusaannut naleqqussarneqarnissaanik oqaatsitigullu ataatsimut oqimaaqatigiissitsinissaq siunertaqarsinnaavoq.

Apeqqu 8. Tuluit oqaasiisa meeqqat atuarfiini allamiut oqaasiitut siullertut atuutilersinneqarnissaannut kiisalu danskit oqaasiisa atuartitsissutigineqartarunnaarnissaannut iliuusissatut pilersaarummik suliaqarnissaq qanoq akeqassanersoq Naalakkersuisunit paasissutissiissutigineqarsinnaava?

Akissut: Naalakkersuisut maannakkorpiag aningaasat qanoq amerlatigeqqissaassanersut oqaatigisinnaanngilaat. Aningaasartuutit, suliamut ilisimasalinnik avataaneersunik peqataatitsineq kiisalu misissueqqissaarnissamut pisariaqartitsineq aallaavingalugu annertussusilerneqassapput. Naatsorsuutigineqarpoq suliat allaffissornikkut periusissiat pioreersut iluanni sapinngisamik annertunerpaamik ingerlanneqarsinnaassasut.

Apeqqu 9. Meeqqat atuarfiini kalaallit tuluillu oqaasiinik atuartitsisarnerup nukittorsarneqarnissaanut iliuusissatut pilersaarummik suliaqarnissaq qanoq akeqassanersoq Naalakkersuisunit paasissutissiissutigineqarsinnaava?

Akissut: Tassunga suli missingersuusiortoqanngilaq. Naalakkersuisut taamaaliortoqassappat iliuusissatut pilersaarutit meeqqat atuarfiini kalaallisut tuluttullu atuartitsinerup nukittorsarneqarnissaanut ineriartortitsinissamut suliniutit pisariallit missingersuusiorterinik aamma imaqaarnissaa anguniassavaat.

Apeqqu 10. Tuluit oqaasiisa meeqqat atuarfiini allamiut oqaasiitut siullertut atuutilersinneqarnerannit sunniutissai pitsaasut pitsaanngitsullu suut naatsorsuutigineqarpat?

Akissut: Sunniutissat pitsaasut tassaasinnaapput nunani tamalaani piginnaasat pitsaanerusut, ingerlaqqiffiusumik ilinniarnissamut piareersarneq ilisimasanullu periarfissaqarnerulerneq. Sunniutissat pitsaanngitsut tassaasinnaapput ikaarsaarnermi unammilligassat, tassunga ilanngullugit ilinniartitsisussanik ilinniartitsinissamut pisariaqartitsineq ilinniartunullu oqaatsitigut ajornartorsiutilinnut annertunerusumik tamaviaartitsinissaq.

Apeqqu 11. Tuluit oqaasiisa meeqqat atuarfiini allamiut oqaasiitut siullertut atuutilersinneqarnissaat pillugu innuttaasut qanoq isumaqarnersut Naalakkersuisunit paasissutissiissutigineqarsinnaava?

Akissut: Innuttaasut ataatsimoortumik isumaannillu takutitsilluartumik maannakkuugallartoq suli misissuisoqanngilaq. Naalakkersuisut isummat assigiinngissinnaanerat aammalu oqaloqatigiittoqarnissaanut peqataatitsisoqarnissaanullu pisariaqartitsisoqartoq eqqumaffigaat.

Apeqquut 12. Danskit oqaasiisa meeqqat atuarfiini allamiut oqaasiitut siullertut atorunnaarsinneqarnerannit sunniutissai pitsaasut pitsaanngitsullu suut naatsorsuutigineqarpat?

Akissut: Sunniutissat pitsaasut tassaasinnaapput kalaallisut tuluttullu oqaatsinik nukittorsaaneq kiisalu oqaatsinik pingaartitsinermik erseqqissaaneq. Sunniutissat pitsaanngitsut tassaasinnaapput danskisut oqaatsini piginnaasakinnerulerneq, naak ilinniakkanut suliffinnullu atatillugu suli pisariaqarsinnaagaluartut. IMAK-ip isumaqatigaa atuartut meeqqat atuarfianni atuartut nalinginnaasumik akunnernik ikinnerusunik atuartinneqartarnissaat aammalu taanna pingaarnersiorlugu ilitsoqqussaralugu oqaatsinik atuartitsinerup atuartut oqaatsiminnik piginnaasaqarnerat taamaasilluni nukittorsarneqassammat.

Apeqquut 13. Danskit oqaasiisa meeqqat atuarfiini allamiut oqaasiitut siullertut atorunnaarsinneqarnissaat pillugu innuttaasut qanoq isumaqarnersut Naalakkersuisunit paasissutissiissutigineqarsinnaava?

Akissut: Naalakkersuisut apeqquut innutaasuni annertuumik oqallisaalerumaartoq ilisimavaat. Innuttaasulli isumaannik aaqqissuussaasumik misissuisoqarnikuunngilaq, taamaattumik Naalakkersuisut peqataatitsineq oqaloqateqarnerillu nangillugit sulissutigeqqinniarpaat. IMAK-ip inatsisissatut siunnersuut tapersersoraa apeqquut 12-p akissuteqataani takuneqarsinnaavoq.

Inussiarnersumik inuulluaqqusillunga

Nivi Olsen